

URDHËR
Nr. 180, datë 22.6.2022

**PËR NGRITJEN, PËRBËRJEN DHE FUNKSIONIMIN E KOMISIONIT
VLERËSUES PËR PLOTËSIMIN E KUSHTEVE TË LEJES UNIKE SI I
VETËPUNËSUAR**

Në mbështetje të nenit 102, pika 4, të Kushtetutës së Republikës së Shqipërisë, dhe pikës 13, të vendimit nr. 584, datë 28.8.2003, të Këshillit të Ministrave, “Për miratimin e rregullores të Këshillit të Ministrave”, si dhe në zbatim të pikës 3, të nenit 67, të ligjit 79/2021, “Për të huajt”,

URDHËROJ:

1. Krijimin pranë çdo drejtorie rajonale të Agjencisë Kombëtare të Punësimit dhe Aftësive të “Komisionit vlerësues për plotësimin e kushteve të lejes unike si i vetëpunësuar”, quajtur në vijim “Komisioni Vlerësues”.

2. Komisioni vlerësues ka këtë përbërje:

- Drejtuesi i drejtorisë rajonale të Agjencisë Kombëtare të Punësimit dhe Aftësive (kryetar);
- Një përfaqësues i Shërbimeve dhe Migracionit (anëtar);
- Një përfaqësues i Qendrës së Formimit Profesional (anëtar);

2.1 Për çdo anëtar caktohet një zëvendësues, i cili zëvendëson anëtarin kryesor në rast pamundësie të përkohshme.

2.2 Përbërja nominale e Komisionit Vlerësues, përfshirë edhe emrat e anëtarëve zëvendësues, miratohet me urdhër të drejtorit të përgjithshëm të Agjencisë Kombëtare të Punësimit dhe Aftësive me propozim të strukturave rajonale të Agjencisë Kombëtare të Punësimit dhe Aftësive. Urdhri përditësohet sipas nevojës, por jo më shumë se një herë në vit.

3. Komisioni i Vlerësimit funksionon në mënyrë të përhershme dhe kryen detyrat e përcaktuara në këtë urdhër.

4. Organizimi dhe koordinimi i punës bëhet nga kryetari i Komisionit Vlerësues.

5. Mbledhja e Komisionit Vlerësues thirret nga dhe sipas rendit të ditës të përcaktuar nga kryetari i Komisionit Vlerësues.

6. Komisioni Vlerësues shprehet nëse për biznesin/aktivitetin e planifikuar:

- rajoni ka një interes ekonomik;
- pritet që ai të ketë një ndikim pozitiv mbi ekonominë;
- aplikuesi ka një kapital të mjaftueshëm për të realizuar idenë e biznesit.

7. Krahas informacionit në formatin e aplikimit *online*, dokumentacioni që paraqitet pranë Komisionit Vlerësues për të provuar plotësimin e kushteve të pikës 6, të këtij urdhri është:

A. Për të vetëpunësuarit:

1) Projektide për biznesin/aktivitetin (që pasqyron minimalisht elementet e rekomanduara nga Agjencia Kombëtare e Punësimit dhe Aftësive);

2) Dokument që provon se ka mjete të mjaftueshme financiare, jo më pak se 500.000 (pesëqind mijë) lekë ose vlera ekuivalente me të në dollarë ose euro (vërtetim nga banka në Republikën e Shqipërisë ose në vendin e origjinës);

3) Dokument që provon aftësitë e nevojshme (certifikatë/diplomë ose dokument të barasvlershëm me të);

4) Certifikatën e regjistrimit në Qendrën Kombëtare të Biznesit.

B. Për profesionistët e lirë:

- 1) Projektide për biznesin/aktivitetin (që pasqyrojnë minimalisht elementet e rekomanduara nga Agjencia Kombëtare e Punësimit dhe Aftësive);
- 2) Dokument që provon mundësitë financiare, jo më pak se 12 paga minimale mujore, sipas legjislacionit në fuqi (vërtetim nga banka);
- 3) Licenca për ushtrimin e profesionit (diploma, dokumentacioni sipas legjislacionit për profesionet e rregulluara);
- 4) Për profesionet e parregulluara (diplomë);
- 5) Certifikatën e regjistrimit në Qendrën Kombëtare të Biznesit;
8. Kërkesa dhe ngarkimi i dokumentacionit bëhet përmes sistemit elektronik *online* për lejet unike.
9. Dokumentet sipas përcaktimeve në pikën 7.A.2.3 dhe 7.B.2.3.4, duhet të jenë të përkthyer në gjuhën shqipe dhe të vërtetuara nga noteri.
10. Me përfundim të rregullt të aplikimit dhe ngarkimit të dokumenteve, sistemi konfirmon marrjen e kërkesës.
11. Verifikimi paraprak i dokumentacionit *online* bëhet nga specialistët e migracionit pranë Drejtorisë Rajonale të Agjencisë Kombëtare të Punësimit dhe Aftësive.
12. Në rast se dokumentacioni nuk është i plotë, brenda 4 (katër) ditëve i kthehet përgjigje shtetasit me komente për plotësim.
13. Kur dokumentacioni është i plotë, specialisti i migracionit përgatit dhe paraqet dosjen e aplikantit te kryetari i Komisionit Vlerësues.
14. Komisioni e bazon vlerësimin, në:
 - a) të dhënat e pasqyruara në formatin e aplikimit *online* në portalin *e-Albania*;
 - b) zbatueshmërinë dhe qëndrueshmërinë e idesë së biznesit mbi të cilin bazohet aplikimi;
 - c) eksperiencën sipërmarrëse të aplikuesit;
 - d) vlerën e kapitalit që investohet.
15. Komisioni Vlerësues, analizon plotësimin e kushteve të pikës 6 të këtij urdhri dhe plotëson procesverbalin përkatës, duke u shprehur në mënyrë shteruese (A plotësohen kushtet? Po ose Jo);
16. Vlerësimi për plotësimin e kushteve të lejes unike si i vetëpunësuar kryhet brenda 10 (dhjetë) ditëve pune nga marrja e dokumentacionit të përcaktuar në pikën 7 të këtij urdhri dhe njoftohet *online*.
17. Vlerësimi i komisionit është i vlefshëm për kohëzgjatjen e planifikuar të biznesit, por jo më shumë se 3 (tre) vjet, bazuar në dokumentacionin e paraqitur, sa kohë që nuk kanë ndryshuar kushtet për të cilat është bërë vlerësimi.
18. Procesverbali së bashku me dosjen e dokumenteve vlerësuese të aplikimit protokollohen. Ato janë subjekt i monitorimit të strukturave të Agjencia Kombëtare e Punësimit dhe Aftësive.
19. Ngarkohen Agjencia Kombëtare e Punësimit dhe Aftësive dhe strukturat e saj për zbatimin e këtij urdhri.

Ky urdhër hyn në fuqi menjëherë.

MINISTËR I FINANCAVE DHE EKONOMISË
Delina Ibrahimaj